

Namjet wyšeho měšćanosty „dotalne zasady strěse“



Choćebuski wyši měšćanosta Holger Kelch (CDU) a starobna prezidentka Edith Pjenkowa na posedženju Serbskeho sejma sobotu w Choćebuzu

Foto: Axel Artt

Choćebuz (SN/at). Jako jedyn z přerich načolnych lužiskich komunalnych politikarjow bě Choćebuski wyši měšćanosta Holger Kelch (CDU) Serbski sejm přeprósyl, so w tamnišim měšćanskim domje schadźować. Na žurli měšćanskich zapóslancow wotmě so sobotu wone posedženje. A to, štož je wyši měšćanosta swojim hosćom prajił, kwitowachu tući wospjet z přikleskom.

Kelch je zwólniwy, „kóždežkuli zhromadne džěło ze Serbskim sejmom podpěrać“. Kak móhło to we wobłuku jeho zamołwitosće wupadać, skonkretizowa wyši měšćanosta z třomi namjetami. Wón ma zhromadne wuradźowanja fachowych wuběrkow Choćebuskeje zhromadźizny měšćanskich zapóslancow ze sejmarjami k wažnym temam za wunošne. Zastupjerjow Serbskeho sejma měli na posedženje Choćebuskeho parlamenta přeprósyc, kaž tež předsydu jeho fachoweho wuběrka za kubłanje, sport, kulturu a serbske naležnosće na schadźowanja Serbskeho sejma. Třeći namjet Kelcha samo po jeho słowach „dotalne zasady strěse: Chcu na kóždolětnu džěłowu rozmołwu ze serbskimi institucijemi zastupjerja Serbskeho sejma sobu přeprósyc.“ Wuprajenje je mjez druhim tež regionalna rěčnica Domowiny za město Karin Tšukowa na wědomje brała. Zdobom pak namołwi Kelch sejmarjow wobstejace struktury sobu wužiwać a z wosobami hromadže džělać, kotrež na namjet Domowiny we wuběrkomaj za kubłanje, sport, kulturu a serbske naležnosće a za socialne, strowotu a mjeńšinowe prawa kaž tež we wuběrku za młodžinsku pomoc města z poradźowacym hłosom sobu skutkuja.

Na připóznawace słowa wyšeho měšćanosty za čestnohamtski angažement sejmarjow prašachu so tući za pjenježnej podpěru za swoje džěło ze stron města abo lutowarnje Sprjewja-Nysa. Za Choćebuz Kelch žane móžnosće njewidzi, wšako tči komuna w konsolidaciji financow, zo by swój wulki dołh wottwarila. Nastupajo angažement lutowarnje pak „hodžalo so rěčeć“, k tomu chcył so z krajnym radu wokrjesa Sprjewja-Nysa Haraldom Altekruđerom (CDU) dorozumić.

W běhu rozmołwy su so přitomni dale wo tym wuměnili, kak móhli Serbow w procese strukturneje změny zapřijeć.